

本朝分省人物考

人物考卷之七十二目錄

福建建寧府

鄭 賜

蘇 序

余 應

楊伯安

張 矩

丘 錫

楊壽夫

藍 智

吳 璞

方 直

徐 奇

丁 顯

江 鐵

張 珮

雷 填

朱 泗

劉童

楊榮

雷境

杜琮

潘賜

雷璲

黃童

張崇

江禎

黃仲芳

黃福

楊誠

葉彬

吳廷用

林順

余畝

連均

陳榮

張添保

張善

范忠

鄭以誠

陳遜

田忠

裴旻

雷吉生

雷潛

吳智

龔貴

滕員

劉福

詹崇

蘇鏞

張瓛

龔沅

吳浩

江泝

吳文元

康太和

徐彪

彭 偕

滕 康

吳 義

趙 熙

魏祖忠

黃 賓

蘇 錢

徐 驥

楊 旦

本朝分省人物考卷之七十二

福建建寧府

鄭 賜

鄭賜字彥嘉建寧人洪武甲子以易經領鄉薦明年舉進士拜監察御史時天下郡邑吏多以汚冒獲戾逮繫無虛日朝廷宥遣戍邊特命賜於龍江編次行伍值暑甚召諸械者諭以主上恩意開示大信脫其械俾各僦居止息每日一一來見衆感悅如期無敢後其有疾病羸弱者日蠲祿米具餧粥湯藥以給之獅子山有道士某僧某見曰鄭御史法官也能惠施

若此於是相率出賣設行庖爲飲食諸戍徒賴以全活者甚衆道路往來困乏之人亦獲其濟皆嘆曰此鄭公惠也秩滿陞湖廣右叅議始至諸曹吏驕蹇奔縱召立庭下訓飭而約束之吏歛手不敢爲非多考滿擢用爲材官者於是咸感賜之德諸峒苗獠反側不常鄰境郡縣數被侵毒賜召其酋長布告恩威結以信義寬其徭賦諸酋感激拜謝誓不再爲惡鄰境之民悉得安堵轉北平布政司右叅議成祖時在藩國賜服事惟謹尤被眷愛復以事相連謫置安東屯行次冀北山谷間父老數十輩拜於路曰吾儕小

人仰盛德者久矣今獲一見幸甚各載壺漿相迎勞  
又携鈔千貫來獻賜力拒不納遂行未幾拔爲工部  
尚書 上卽位轉刑部尚書賜內廐名馬踰數日以  
憂懇請去位 上初政圖任舊人勉留賜乃止每日  
出則正衣冠視事夕入則易服就位哭奠如儀永樂  
三年遷禮部尚書凡朝會祭祀貢獻禮儀叅酌準式  
質文彬彬奏議詳雅人誦其能嘗病暑 上數遣人  
賜藥物有詔命儒臣纂修永樂大典賜實錄之接士  
有禮御下有恩以寬廉平直聞於天下號稱名臣永  
樂六年卒

蘇 岸

蘇岸字伯厚建安人自幼以聰敏聞比長博通經史尤精毛詩爲文章援筆立就聲譽日起岸益自沈晦篤意事親講學絕跡不至城府國初以經明行修薦至京師以親老辭歸闢館授徒誘掖學者多所造就洪武乙丑郡辟爲本學教授周斌勉之曰旣仕不離鄉又得祿養親不宜辭岸從之居學校十餘年啟廸作興之功尤多內外艱闋來朝授晉府伴讀與修太祖高皇帝實錄尋陞翰林侍書纂修永樂大典爲總裁明年陞檢討常進講文華殿敷說稱旨甚見禮

遇兩典考禮部會試簡拔多佳士耿介負才氣勇於爲義方爲教授時學地舊爲軍衛所侵力復之文先生祠在府廨內難於謁祭倡率出貲葺祠於學宮傍歲時朔旦拜謁復修孔子廟及宸奎尊經二閣數月百廢具舉在翰林幾十年絕無私謁禮部尚書鄭公賜有師友之舊未嘗一至其門鄭公常請見必規以正言每加敬服其餘諸生或仕於朝或爲守令者會次輒加誨諭故出其門者咸操守有品人有一善稱之不絕于口對同寮詞氣溫和罕失色於人居家有禮法服用儉約自號曰履素

余應

余應字則亮政和人蚤從江惟志遊以私淑文公之學性凝重寡言笑恒以禮自律家遷闈闇足跡未嘗入縣門蚤失所恃事繼母愉而婉處繼母弟順而友凡飲食衣服必先弟而後及已洪武初以明經薦起爲儒學訓導遷留守司知事執父喪一遵文公家禮不用緇黃

楊伯安

楊伯安字文思建安人性敏能文早喪父事母孝尤篤友于之義洪武初有司嘗以人材薦伯安以母老

不就兄伯祥應斗役虧糧罪當死伯安請于母曰兄無嗣而不肖有子可以代兄死母泣然其請卽詣獄被械者歲餘臨決日忽遇恩宥乃得還

張 矩

張矩字孟方其先廣陵人父伯巖爲五夫巡檢家焉矩依屏山劉子翬家得其遺書而讀之遂通五經大旨洪武初薦授儒學訓導諸生從者隨其資質高下各有所得所作經義明白簡切一時學者宗之

丘 錫

丘錫字永錫崇安人領洪武己卯鄉薦蒞事工科自

陳願文學職除衡州教授永樂四年預修永樂大典改衢州教授宣德七年又預修太宗皇帝實錄書成仍乞學職改建昌教授陞正九品秩自筮仕以來凡典文衡者五人咸稱其公明性尤嗜學致仕猶手不釋卷卒年八十有八

楊壽夫

楊壽夫名松以字行建安人洪武辛巳郡守芮麟薦授縣學訓導秩滿諸生請留遂陞本學敎諭歷二十餘年多所造就凡考典鄉試者五會試者二宣德中少師楊士奇輩文章薦之陞翰林編修預修宣廟

實錄陞修撰正統中致仕卒於家

藍智

藍智字明之崇安人元季從三山林泉生學春秋又從杜清碧學詩洪武十一年以明經薦拜廣西按察司僉事廉惠之聲著于一道有藍澗集兄靜之元季爲武夷山長亦學詩於清碧有藍山集

吳瑾

吳瑾字士瑜政和人洪武間由國子生授直隸常州府推官發囚訊問務推誠意使自引咎甘服不事拷掠及得其情惻然哀矜之意見於辭色在官六年獄

訟幾息廉恕之聲動于畿輔及再考以疾卒于京柩  
過常州郡民爭先哭祭

方直

方直字孟周崇安人洪武間由學諸生授萍鄉縣典  
史改豐城縣以廉能著稱繼入文淵閣纂修陞知縣  
海寧縣改新鄉縣尋以當道薦爲監察御史頗有風  
裁後以不避權勢見沮出知新喻縣致仕卒

徐奇

徐奇浦城人洪武中由鄉舉歷官戶科都給事中物  
論重之陞廣東右布政使能聲益著方擬遷擢卒於

官

丁顯

丁顯建陽人博通經史洪武乙丑進士第一授翰林院修撰國朝狀元及第自顯始顯才華炳奕內行修謹人咸謂不負其科名

江鐵

江鐵建安人永樂中登進士第選翰林庶吉士尋擢監察御史得風憲體人憚其威累官廣東布政卒于

官

張珂

張珂建安人永樂中進士擢行人歷遷吏部郎中練達老成銓司甚倚重之尋陞浙江布政司左參政以廉惠著稱致仕卒于家

雷 填

雷填建安人由進士授給事中彈劾不避權勢嘗被命巡撫蘇浙常等府暮歲封章凡四十上皆切時弊又嘗巡撫廣西利害所當興革悉疏以聞夷民懷服卒于官橐無寸帛惟潔衣半篋詩文奏稿而已

朱 泗

朱泗建安人熹八世孫領永樂甲午鄉薦除直隸壽

州判官改徐州值歲灾饑泗留本州京運以賑民而後申白民多所全活

劉童

劉童建陽人永樂中進士知湖廣寧遠縣廉能著聞觀風者薦其才略出羣以嘗忤時相事竟寢歷陞蒙化州知州致仕卒童號稱循吏特以鯁直不屈遂至坎坷終其身

楊榮

楊榮字勉仁建安縣人天資英異初名子榮鄉薦魁入閩革除庚辰登進士入翰林院爲編修文帝履

極更其名榮簡入內閣初入閣之臣七人惟榮齒最少最警悟一日晚寧夏報被圍上急召解縉等七人皆已出惟榮赴命上不憚示以奏曰爾後進寧解此今當遣何處兵往救榮曰不須救臣嘗奉使至彼其城堅且人皆習戰今發已十餘日虜必退但勑守臣固守及鄰近諸城堡隄備可矣不必遣兵重爲煩擾也夜半虜圍解報至詰旦上詔榮以報書示之諭曰何料敵之審也吉安鄉民嘯聚先遣行人許子謨齋勑撫諭行將一月又遣都督韓觀統兵繼之至是江西三司奏言嘯聚者悉已復業上命榮

降勅褒觀對曰計發奏之日觀尚在中道耳未足褒  
從之自是信任益重時四方事務方殷榮與解縉等  
七人旦夕侍左右承顧受旨退治職務且兼稽古纂  
述之事不虛寸晷 上時步閣中親閱其所治咸稱  
旨進官修撰數月復進侍講二年立 皇太子陞右  
春坊右諭德仍兼侍講 成祖嘗謂榮曰恒情保初  
易保終難朕固常思保全之道爾亦宜益謹厥終庶  
兩盡其美因賜象笏幞頭公服尋賜二品金紵絲衣  
以示旌異三年秋召榮評議諸司事宜以奏對稱旨  
賜二品金織紗羅衣及鈔幣五年奉命往甘肅規畫

軍務所過覽山川形勢察軍民休戚閱城堡虛實七月回京奏對武英殿時盛暑命取瓜親剖賜榮且遣中官賜以羊酒勑命休息幸陞奉議大夫右庶子仍兼侍講六年聞父訃告歸命馳傳以往既襄事乃檢鄉黨平日有假貸錢穀弗能償者悉焚其券族人有喪不能舉者悉爲葬之孤弱不能自存悉收養嫁娶之有因產業致爭者割已業畀之詔奪情起復宗戚鄉鄰送行者咸垂涕去抵京未閱月命榮等輔導皇長孫七年榮聞母訃當去職時車駕將幸北京特留扈從賜錦衣狐裘鞍馬三月抵京賜宴榮辭以

母憂弗與特命中官以珍饌送至家七月甘肅總兵  
官都督何福言韃靼脫脫不花王等各率部落來歸  
往甘肅與福經畫還奏稱旨復命持節經寧夏與寧  
陽伯陳懋規畫邊務旣還至甘州福盛陳餽遺一無  
所取還京復命陳邊境便宜十事上嘉納之賜以  
襲衣鈔幣八年從征北虜成祖度野狐嶺至山巔  
召學士胡廣及榮指示山川形勢三月車駕發  
凌霄峰榮與胡廣金幼孜金純四人失道成祖命  
中官二人及傳令者追尋得之時已昏黑中官疾馳  
去榮等復迷入窮谷中幼孜墜馬胡廣金純不顧而

去榮下馬爲整鞍轡不數步幼孜復墜馬鞍盡裂榮卽以所乘馬讓之自乘辱馬從夜至旦方望見左掖趨赴之至午詣中軍成祖大喜慰問良久嘉榮之義復笑語幼孜曰此中多狼汝非楊榮詎能免乎榮謝曰僚友之分詎所當然成祖曰胡廣豈非僚友耶何不顧而去也五月車駕至驥河駐蹕河上親選勇士三百人專令衛護不以隸諸將特命榮掌之胡寇平班師軍士乏食榮力言卽日召乏糧者赴中軍以御膳所儲糧炒散與之且下令軍中凡糧炒多者許假貸回京倍酬其值由是獲全者衆七月

至開平中途召榮還南京計事十月扈駕南旋九

年乞奔母喪賜白金鈔幣遣中官宋成伴送且勑速來抵家拜謁墓下如初喪還京成祖召問閩中民情暨歲豐歉榮條對詳實九月皇太子命侍諸皇

孫讀書文華後殿榮每進講罷必從容以正心崇德親賢去邪尚儉戒逸之言進深見嘉納或訪以政務必陳其切要及先後緩急施行之序皆懇切無少避忌皇太子每稱其忠直十月重修高皇帝實錄

命爲總裁十年甘肅守將西寧侯宋琥言叛寇老的罕等將爲邊患勅守陝西豐城侯李彬討之仍命榮

往經略榮還具言戎狄豺狼叛服常態不足以勤大軍遂勅彬旋師叛者尋附十一年復扈駕幸北京十二年三月扈征瓦刺時 皇太孫侍行 成祖諭以營中稍間卽以經史講說庶知古今成敗得失之迹可以鑑戒榮每遇駐營伺間進講 皇太孫甚嘉重之四月駐蹕興和以尚寶司乏人命榮兼掌其事凡出號令與宣傳之事勅旨旗牌不得榮奏允不敢發乙卯師次大石鎮晚涼 成祖坐御幄中召問足食足兵之策榮對宜擇將帥力屯田將得人則軍士弗擾軍士安則耕不違時不患兵食不足 上是其

言秋八月還北京十一月命舉朝臣及在外教官有文學者同修性理大全開館於東華門外諭榮使總其事書成命宴於禮部并賜鈔幣十四年陞翰林院學士仍兼春坊庶子十月扈駕南還十五年駕復幸北京屢召問民情榮悉以實對賜白金鈔幣十六年五月朔進太祖高皇帝實錄成祖御奉天殿受之披閱良久嘉獎再四會學士胡廣歿榮掌翰林院事成祖注意益隆而榮在衆中詞色嚴厲諸大臣往往忌嫉陰欲疎之屬北京國子監乏師因薦榮可爲祭酒成祖曰吾固知其可汝但求可以代

之者於是衆意銷沮六月詔修天下郡邑志命榮總之十七年進言十事皆指斥五府六部三法司積弊成祖覽而喜之密與榮曰實切時病但汝爲心腹之臣若進此言恐羣臣益相猜疑不若使慎密御史言之於是得監察御史鄧真俾入奏衆皆股栗免冠請罪詔諸司卽日悛改怙終者不赦凡所改皆益國利民之事十八年陞文淵閣大學士兼翰林院學士特賜宴於禮部先是成祖以四夷諸番字中國宜解其義因選大學生習之諸生多不欲輒生謗議上怒將罪之榮力救得免遂命榮掌之榮訓勵得宜

自是帖服不敢妄有所言率皆有成十九年正月北京宮殿成初御朝賀 成祖於榮特密加賞賚他人弗與焉四月奉天華蓋謹身三殿災火勢猛烈奉天門東偏切近密閣榮奮身直入麾衛士三百人將御書圖籍并積歲制勅文書昇至東華門河次 成祖嘉之賜銀酒杯古銅器各一事鈔千錠壬寅降勅訪求民隱榮首陳利國便民十餘事 上嘉納命悉入詔條頒行之時翰林侍讀李時勉等十餘人爲飛言所中 成祖怒欲罪之榮力解得免是冬逮戶部尚書夏原吉等下獄禮部尚書呂震侍左右屢言夏原

吉愷邪評罔 上益怒

一日御鷹坊司特召問原吉

等平昔所爲榮極言其無他 上怒稍釋寘而不問  
二十年三月從征沙漠每軍中命公侯大臣議機務  
密令榮參決無不稱旨特召榮於御幄中同公侯大  
臣坐飲凡有賜賚榮與之俱其特賜榮者公侯或不  
與而諸扈從文臣亦皆弗與秋八月還京師九月宴  
隨征將士命榮坐前列食上殼賜鈔幣并二品金織  
襲衣靴襪閏十二月詔復西征方以士馬糧餉爲艱  
有以建文間江西梁集民兵與餽運丁夫十餘萬可  
徵用爲言者榮曰此兵昔有詔令復業今復徵之是

失信也 成祖笑語榮曰卿言正合朕意遂寢其奏  
二十一年秋扈從征西駐師萬全一應軍務悉命榮  
掌之自晝至夜或三接宣詔每以楊學士稱之而不  
名冬十月寧陽侯陳懋奏番王也先土干款命榮往  
大同議納降之禮回營奏對稱旨賜以御饌慰勞甚  
至冬十一月旋師明年三月復征北虜五月榮言軍  
士勞苦宜遣使諭胡虜釋其不順之罪 成祖遂勅  
中官及所護諜者往虜中諭其部落來歸遂班師會  
巡按浙江御史王復奏處州麗水建寧政和山寇周  
叔光等聚二千餘人往來行劫漸至滋蔓請發兵捕

之命兵部尚書李慶等議調兵捕勦崇從容進言謂彼皆愚民或爲有司所苦或爲衣食所窘不得已逃入山林苟活朝暮耳何敢爲亂若寬而撫之當遂散矣急則堅其爲盜之心况兵戈所加不免枉及良善願更思處置之宜 成祖曰卿言是也可勅閩浙三司招撫若復頑梗弗服用兵効滅未晚旣而果悉順服丁亥次翠微岡 成祖御武帳中憑几而坐顧內侍海壽曰計程何日至北京對曰八月中可至已乃諭榮曰東宮歷歲滋久政務已熟吾還京之後悉以軍國之事委之朕惟優游暮年以享安和之福耳辛

卯次榆木川

成祖不豫召

不等受遺命傳位

皇

太子遂崩衆倉卒莫知所措榮一遵古禮斂舍如禮謂太監馬雲等曰六師去京尚遠不宜發喪所至宜上食如常儀衆是之復條畫軍中事宜號令益嚴人皆莫測壬辰次雙筆峰榮奉遺命馳赴 皇太子八月至北京致 大行皇帝遺命退而復以軍中所宜施行者陳之 皇太子嘉歎賜以白金鈔幣翌日復承命同蹇義等議卽位事宜榮首條民間不便二十餘事 上進皆嘉納之命入詔條頒布 仁宗卽位陞嘉議大夫太常卿仍兼前二職九月進太子少傅

兼謹身殿大學士賜銀印一其文曰繩愆糾繆且諭  
榮以政務闕失則用此印密疏以聞至於再三慎母  
憚煩十月皇太子正位東宮榮以師傅之重朝夕  
侍側悉心匡輔丁巳大理寺奏決重罪上令少傅  
楊士奇及榮同任審錄寃抑者多獲伸理十一月丁  
亥上御西角門閱廷臣誥詞因取榮等三輔臣暨  
蹇夏二尚書誥詞親增二語云勿謂崇高而難入勿  
以有所從違而或怠曰此朕實心卿等勉之榮對曰  
皇上聖德之至臣等其敢不勉十二月加工部尚  
書仍兼二職降勅歷褒其功初榮扈從北征成祖

委以軍務及 上賓之日所行喪禮并軍中處置事  
宜 上聞訃之時不及訪問至是有以爲言者 上

益重之元年正月 上御奉天門朝羣臣撤樂止行

五拜禮先是禮部尚書呂震請曰 皇上新卽位天

下文武之臣以暨海外諸國悉來朝賀宜設鹵簿作  
樂如大朝之儀以稱瞻仰弗聽旣而震固請 上曰

山陵甫畢忍遽卽吉榮等對曰誠如 聖諭必欲受

朝不宜備禮從之翌日諭榮等曰爲君以納言爲賢  
爲臣以直諫爲忠如朝會一事若從震請追悔何及  
賴汝等直言幸免斯咎自今有弗逮卿毋惜言之丁

丑榮懇辭尚書俸弗允三月命魏國公徐顯宗讀書  
國子監召榮往諭司業此開國元勳之裔欲其家與  
國同久必教之讀書知道理乃可以長保富貴其篤  
意訓之五月勅修成祖皇帝實錄命爲總裁每朝  
退上還官遇有機務須計議者必親灑翰墨書榮  
姓名識以御寶或用御押封出規畫榮條對詳悉皆  
如聖意辛巳仁宗升遐宣宗卽位益推心委  
任榮承事尤謹閏七月勅修仁宗實錄復勅修歷  
代臣鑒外戚事鑒皆命總之八月漢王叛差百戶陳  
剛齋本指斥乘輿聲言犯闕榮曰彼謂陛下新立

必不自行故敢爾若出其不意而以天威臨之事無  
不濟臣請先行誓不與賊俱生 上從其計榮晝夜  
疾馳至卽合圍督軍士築土山山成而 大駕至衆  
呼萬歲聲振城中漢王知不敵遂開門出降詔討王  
斌等同爲謀者免漢王爲庶人改樂安州事平回京  
賜鞍馬白金鈔幣二年賜範銀圖書五其文曰方直  
剛正忠孝流芳關西後裔建安楊榮楊氏勉仁且面  
致訓戒以表眷待之隆又親御翰墨作春山竹石牧  
牛三圖題詩其上裝成卷軸賜榮并賜端硯御用筆

墨十月交吐黎利遣人進前安南陳王三世嫡孫高

表乞立爲陳氏後 上以示文武大臣蹇義夏原吉等皆勸發兵擊利 上召榮及楊士奇定計榮曰交趾在荒服外漢唐以來雖嘗爲郡縣然叛服不常棄之可也時楊士奇亦贊榮言當從 上從之十一月皇太子生 宣宗皇帝親酌酒賜榮飲并賜白金鈔幣及金酒器三年二月命榮同少師蹇義等十八人從遊 萬歲山詔許乘馬從東北門入各携從者二人至乾明門下馬登山繼命乘舟泛太液池至新圓殿俄頃 宣宗乘黑駒馬至召士奇與榮詢問民甚悉賜以濱醅酒人各令盡一甌復命遊小山看西

所貢二獅復遍閱諸景日將西令中官侍宴松林  
之下各賜鈔三千貫從者賜鈔三錠并給酒餚且傳  
旨免謝明日入見復各賜椰子慰勞甚至三月奉命  
持節冊中宮禮成賜白金綵幣秋七月辛酉賜遊內  
苑賜以金銀綵幣玉杯酒饌等物八月扈 駕巡邊  
給以內廄良馬命榮先從出塞師次寬河遇虜衆將  
入寇且道隘師難並進 宣宗親帥師勦平之班師  
還京榮進平胡詩凡十篇 上覽之喜復沐白金鈔  
幣之賜十月 上不欲煩榮以有司事乃賜勅獎諭  
令其輟翰林之務朝夕左右一日 上問今日之貪

誰甚榮對曰莫甚劉觀 上撫掌歎曰除惡務本及  
楊士奇薦顧佐可代榮曰佐亦嘗爲京尹能禁下吏  
政清弊革有旨令劉觀巡視河道拜顧佐爲右都御  
史十二月兩遊南海子賜羊酒及鈔四年己丑正月  
陪祀南郊賜金銀鮮果等物十一月有市犯告都御  
史顧佐枉人重罪不聽訴理者 上大怒召榮及楊  
士奇諭曰此必有重囚教之排佐小人陷正人不可  
不究治及法司鞫之實千戶臧清殺一家無罪三人  
當死教之誣告立命磔清於市甲申陞少傅仍兼前  
二職三俸俱支固辭大學士俸詔許之丙申賜宴文

華殿 宣宗親待焉榮昔有賜賚必奉親及親歿而朝廷恩眷日隆至給三俸恒以親不逮養爲歉乃請以少傅俸於鄉邑給受以供祭祀及周卹親戚故舊朋友之貧乏者七年正月元宵節賜觀燈於內苑仍賜白金綵幣遣中官送於其第及賜御製祖德詩招隱歌猗蘭操八年少傅滿三載賜宴禮部降勅獎諭九年扈駕巡邊給以天閑名馬比還恩賚甚厚賜詩褒嘉十年 宣宗晏駕榮與少師蹇義等僉議卽位事宜舉悵羣情 英廟卽位勅修 宣宗皇帝實錄命充總裁賜宴禮部冬十月命監立天壽山碑明

年榮與太師英國公張輔等二三大臣建議開經筵  
以緝熙聖學詔可其奏甲戌 上御文華殿開講榮  
講堯典克明峻德章敷析明暢音吐鴻亮宴於禮部  
尋復賜金織紗羅襲衣金箱玳瑁香帶各一榮以累  
朝舊臣親受顧命被 皇上眷寵優異慨然以身任  
天下之重精力瀕老而不衰遇事雖繁劇應之常若  
簡而有餘凡所論建勳協人心五月奏少傅滿六載  
陞授光祿大夫柱國四月 宣宗實錄成 上御奉  
天門慰勞再三陞少師賜白金綵幣名馬宴於禮部  
五年二月從耕籍田禮成卽上章請告展先墓詔賜

允降勅書諭遣且命內侍阮江伴行水陸給驛公卿  
大臣出祖都門外觀者填道朝野榮之至家歸省先  
壠大散宗親故舊金幣賓客過從宴洽累月六月還  
京力疾就道次杭州而薨卒於武林驛享年七十內  
侍阮江以訃聞 上哀慟輒視朝一日贈特進光祿  
大夫左柱國太師謚文敏遺禮部尚書胡濱等諭祭  
仍命江護喪歸里營葬榮在朝廷薦舉惟賢無間親  
疎人有因事詬誤而囚繫者從容爲之解釋 上知  
其忠直固不聽從而陰受其惠者甚多榮歷朝四十年侍  
四聖左右參贊機務惠澤及人不可勝計人

莫能知矣亦未嘗言至其往還則不妄動勞悴從征  
胡寇乘危蹈險人所弗堪亦未嘗告勞避退起居皆  
有常度凡所有所履務精於理道絕不爲戲狎之言論  
事 上前詞氣溫厚委曲至與僚友分別淑慝審辨  
邪正則凜然不可犯暇時接見朝士大夫及方岳牧  
守從容咨訪時政人才以備顧問所居東偏構屋環  
植花木扁曰靜軒退朝之暇衣冠正坐焚香賓茗對  
所知談論經史每至夜分朝門東南築室樹以槐柳  
退食則燕息其中或宴會爲樂名其堂曰聚奎其議  
刑辟萃歸寬恕於四裔邊徼事及邊將勇怯知恩靡

不通知說者稱其相業有姚崇之風所著有默菴集  
雲山稿靜軒卷退思集北征訓子編

### 雷境

雷境字彥達建安人幼孤事母至孝性純篤究心書  
史家貧無以自給裕如也永樂初有司以孝薦之固  
辭乞歸絕跡城府鄉人從其受學者多如修禊連智  
輩數十人皆擢進士第後相與追號之曰慎齊先生  
所著有閑居叢稿

### 杜琮

杜琮字孟清號蒙齋甌寧人永樂初應詔預修大典

領應天府辛卯鄉薦歷上高全椒二學教諭用選拜監察御史陞山東布政司叅議皆克舉其職卒于官所著有適興錦江二集藏於家

潘 賜

潘賜字文錫浦城人永樂初登進士第授行人嘗使日本還朝獻德化書大典頌太宗皇帝覽之稱善命入史館擢鴻臚少卿再使日本回陞江西布政司右叅政後落職洪熙元年起爲南京刑部主事長於斷獄律比精詳宣德間復除鴻臚少卿又使日本歸宣德皇帝甚加獎勞未幾卒于官居官操履方正

所著有容菴等集

雷 琢

雷琢字有螭建安人永樂中進士選爲翰林庶吉士纂修國史拜監察御史巡按雲南奏劾內使十有九人悉寘於法還朝復命以語音不正出知蕪湖縣後以薦起爲浙江按察司僉事振肅紀綱風裁凜然會處州草寇葉宗祺竊發琢勦滅之尋奉勅巡視浙江福建江西三省海道許其便宜行事歷八載卒于官淵人哀之以詩有除却數函圖冊外別無一物載歸舟之句

黃童

黃童字仕穉政和人由大學生擢陝西按察僉事左  
遼寧遠縣丞太宗正位陞監察御史奉命巡按直  
隸淛江時吳江平望八尺湖多盜賊童假民船載粟  
詐爲客商賊至密以灰水灑之翌日驗有灰跡者捕  
之悉得真盜蓋卽巡檢司弓手也仍奏置石堤於湖  
中爲水門時其啟閉刦掠之患遂息嘗道見一大蛇  
昂頭若有所訴童問曰汝必有冤乎蛇卽叩頭而去  
令人尾之抵一家後園入穴內掘之果得劫殺客  
商之屍因抵於法人以爲神後陞廣西副使卒于官

張 崇

張崇字存高建安人永樂中由太學生授蕭山知縣爲政仁恕有愷弟之風秩滿陞通判撫州轉處州所至有清操民至今懷之致仕卒于家

江 穎

江禎建安人登永樂甲申進士第授禮科給事中特立不附禎面常紅赤色一日奏對 上前 上以爲被酒禎不敢辨遂謫爲都察院吏踰年 上始悟特除龍游知縣爲政務存大體有惠愛於民民甚得之卒于官

卷之二十一  
黃仲芳

黃仲芳字時茂建安人永樂中進士選爲翰林庶吉士知東陽縣首鋤豪民及奸吏之爲民患者鄰郡有盜犯境仲芳以計殄絕之郊有三虎爲暴仲芳移文城隍果射中其一餘遁去秩滿邑民詣藩臬懇留弗獲有涕泣者大臣以才行薦擢湖廣左叅議施州有僞土官田姓者殺兄而奪其位越十有八年捕之不能得仲芳設方略擒之尋遷雲南右叅政奏開中鹽之法以助軍餉卒于官所著有澹菴集旬宣集琴堂

薇垣平恕錄

黃 福

黃福字汝錫甌寧人博通經史領鄉薦授杭州府儒學訓導勤於教誨生徒多所造就陞太常博士永樂中與修五經四書及性理大全諸書陞本寺寺丞

楊 誠

楊誠字性之松溪人永樂中領鄉薦授四會訓導秩滿陞天台教諭改縉雲所至陶淑士子多所成就以致仕卒操履端方問學該博所著有鐵崖藁

葉 彬

葉彬字允均建安人父濬永樂丙戌進士知鄱陽縣

一日公出暴雨壞廨垣彬祖母令人撤榜板以權蔽  
雖家發其事彬母聞法當論死欲以身代彬時年十  
歲卽自詣官首實得收贖後都察院疑其獄逮問拷  
掠再四終始一詞甫得 聖裁宥免未幾父卒祖母  
亦故彬與母同扶二柩還家母誓不再醮躬親紡績  
以給彬學後彬學成歷六安虞城二學教諭

吳廷用

吳廷用政和人永樂中登進士第授戶科給事中  
仁宗監國廷用侍從二十餘年小心謹密甚蒙寵眷  
暨嗣位特陞刑部左侍郎宣德間陞禮部左侍郎歷

性咸有能績累章乞歸老卒

林順

林順字孝從政和人號遲軒弱冠爲鄉校師學者多所造就永樂間邑令黃裳舉孝廉不起又以楷書薦力辭不起終身守澹素遠榮利視冠服若穢夷然不屑年八十八卒于家

余畊

余畊字希尹政和人性凝重寡言蚤喪父獨奉母以居讀書刻苦有造詣鄉人從之遊者隨才質高下皆有所得下筆作詩文頗有古意永樂間邑以楷書薦

郡守芮麟令書字以觀畱因書遊子吟復之遂拂袖歸

連 均

連均字士平號素菴建安人登永樂乙未進士第授監察御史遷江西布政使所至皆有能聲歷仕垂四十年產業無有所增拓子孫僅免於饑寒人稱其廉天順初致仕卒于家

陳 榮

陳榮字希仁甌寧人少失怙事母孝謹備極甘旨母患目疾失明晝夜扶侍不少離每夕繕綺北辰祈母

日復明似聞有人語曰以舌舐之愈榮如其言凡十  
年一旦復明母後患病卒二日心尚微溫乃以藥灌  
入鼻至夜復甦年九十四終永樂丙申建寧大水二  
子俱髫年乘流一夜餘抵福之螺洲遇潮衝達岸得  
不死隣家弗戒于火及其廬數四輒反風而滅鄉人  
以爲孝感所致

### 張添保

張添保字求安浦城人天性至孝痛父早世言及輒  
流涕哽塞事母尤謹承顏順志未嘗少懈母患癱親  
爲吮血及卒殯殮葬祭一千禮鄉間有貧窘無告者

計家資有餘卽推以賑濟之義方之教尤篤長子善登永樂辛丑進士第拜監察御史

張 善

張善浦城人登進士拜監察御史以廉介自持出按廣東馬軍林思祐倚權勢肆行剽掠害民滋甚善捕其黨三十餘人寘諸法民賴以寧尋致仕去

范 忠

范忠甌寧人登永樂甲辰進士授兵部主事以謹厚稱嘗奉命往蘇松等府捕盜綽有能譽

鄭以誠

鄭以誠甌寧人永樂中領御薦授吏科給事中陞  
南叅政招撫千厓南甸流移二千五百餘戶開懇通  
海河西二縣荒田二千五百餘畝種種咸有成績

陳遜

陳遜浦城人登永樂間進士任監察御史廉介有直  
聲累陞雲南布政使卒于官橐無餘貲都督沐昂爲  
棺殮以歸其喪

田忠

田忠建安人由宣德間進士累官江西左叅議致仕  
家居二十餘年自奉泊然平生不肯干人以私非公

事未嘗一至官府至於晚節屹立凜然不少屈抑人以爲難

裴旻

裴旻崇安人登宣德進士累官江西僉事廉介嚴毅糾察不避權貴風紀肅然卒于官上諭惜之

雷吉生

雷吉生建安人由宣德進士除御史正色立朝巡歷江西湖廣山東所在風裁凜凜貪墨歛迹

雷潛

雷潛建安人宣德中領鄉薦除武選司主事陞郎中

正統己巳之變死于難

吳智

吳智甌寧人領宣德己酉鄉薦累官國子助教所在嚴約束敦士習多所造就子文第進士

龔貴

龔貴浦城人領宣德中鄉薦歷官撫州知府所至興學校雪冤滯以政績著聞

滕員

滕員字尚默甌寧人幼以開敏聞于鄉鄉之父老異之曰滕氏子年幼而質粹不凡子也年十一補郡庠

弟子員庠之師儒奇之曰滕某質厚而性敏遠大器  
也未幾領鄉薦卒業太學聲譽焯起同舍生成心服  
之正統己未吏部考選居優等得廣之韶州府同知  
一時同選者咸謂其才與官宜抵任值歲歉公私無  
積貯守以下無籍手地員至傾囊得白金若干兩告  
擢鄰郡命里耆籍民之窘甚者給之全活數千人郡  
治舊爲淮王府王遷國之饒得請復爲郡其規制侈  
大非人臣所宜居又吏胥公退無所於處往往雜就  
民居員截長縮大削雕還樸度地爲吏舍限其出入  
絕吏民交構之弊所部地介江閩湖三藩之衝主戶

少而客戶多少拂其意輒相煽搆而翁源乳源二邑尤甚員躬行巡省揭榜開諭許其占籍遂與編戶無異丁內艱解任吏民不忍其去比聞服闋耆老數百人詣闕乞再任朝議已除代者不允員適至遂有祠部之除在郎署踰三年正統己巳扈駕北狩死焉年五十有二

劉 福

劉福建安人正統壬戌進士累官河南按察使所至持憲嚴明人不敢犯搜除蠹宿弊立清尋陞浙江布政使卒

詹 濬

詹濬字子源浦城人幼穎敏博學強記旁通陰陽地理星命卜筮之書歷上海進賢二學訓導正統丁卯典四川文衡陞南昌學教諭善誘後進多所成就陞潮州府學教授幾三載卒于官有竹軒集

蘇 鏡

蘇鏗字良璇建安人別號守愚性敏好學善顏柳書法以孝友稱正統間沙尤寇起延及鄉里有司以其信行素服委之招撫躬抵逆巢衆皆退聽邑賴以寧年七十終

張 獻

張 獻字孔圭自號慎菴浦城人年十一游邑庠卽問聖賢行已之要於師師異而禮之年二十七貢諸禮部卒業南雍成化庚子舉應天高第屢不利禮闈丁未試吏部簡授江西贑州府推官時汀韶寇大侵贑境重以饑疫民死徙殆盡獻持檄走諸邑增治城壕勞徧周卹瑞金石城二縣故無城城自獻始當是時獻力爲規勸且屢請發帑於上語甚切至活者數萬人旣又重逃復之典權婚嫁之宜申掩埋之令稽古荒政而加敏惠焉其治刑尤加意疑獄他郡獄未理

者亦多移蒞於徽有俠民金伸誣告死罪轉引二十  
餘人獄死者過半徽得其情亟白於錄囚使者釋其  
未死者七人在官前後平反死刑四十餘人徒流以  
下者不可勝紀秩滿擢贑州同知徽職清戎清戎某  
御史方以苛察繩下虐及無辜徽抗言無隱見抵弗  
顧既而嘆曰吾不能殃民以奉人與其齷齪於位退  
不猶愈乎卽移疾請致其事疏發三日遂行至廬陵  
病卒性孝友以祿不逮父養養母曾氏甚謹與諸兄  
處愛不忘規自奉約而急於周人外重內剛不以權  
貴奪而理棼修墜裕如也嘗集古格言爲世訓一卷

所著詩文有慎菴小稿六卷錦江雜咏四卷藏於家

龔 沅

龔沅建安人弱冠以文名登成化己丑進士授主事督稅兩浙焚香自矢不私一錢商無過取國有餘課士論賢之

吳 浩

吳浩建陽人由國子生授肇慶府經歷受命築四會新興二縣城有化盜安民善政從征廣西累受旌賞

江 沢

江沢建安人自少豪邁不羈登成化丙戌進士授監

察御史出按外藩綽著能譽陞四川副使致仕

吳文元

吳文元甌寧人成化丙戌進士除御史巡按浙江禁奸革弊無所顧忌杭大火灾民不堪命乃發倉給食民賴以安歷河南按察使卒端重詳雅居官務存大體不察察爲明於權要竟未嘗少屈人稱之曰百鍊剛

康太和

康太和字原中蒲城人弱冠補邑庠嘗遇貞肅林見素于道林降輿與揖明晨踵謝林延坐獎進者久之甲午領鄉薦明年登進士世宗皇帝御文華殿親

試選庶吉士丁酉授編修辛丑同考會試乙巳預修

會典

己酉主試順天辛亥遷右春坊右諭德癸丑主

順天武舉是年遷翰林侍講學士視院篆分宜用事

無論館閣莫不奔走其門和絕跡不事干謁筮仕幾

二十年始進南京禮侍時倭夷孔棘詔九卿各陳所

見和疏屯要害練鄉兵固防守寬委任四事上嘉

納丁巳考績和守南部八年不調或諷之乃作拙宦

對以述己志辛酉遷南工部尚書正已率屬罷一切

浮靡之費會景王分藩之國道金陵凡百經費皆預

爲之備綜理之周識者嘆服癸亥再疏自陳上允

致仕初郡城陷士夫多避亂徙居會省和因僑寓嘉禾越四年還莆覩邑里蕭條愴然流涕因捐俸賙給族黨暇與司空林端簡及同輩年七十以上結社爲樂或以擬之香山年八十卒所著有礪峰集

徐 彪

徐彪字宏傑浦城縣人性至孝事父母菽水必親善承顏色無有違志父疾湯藥嘗而後進宵衣侍卧起不解帶者三十餘年既終爲孺子泣骨瘠幾不勝葬殮一皆如禮廬於墓側日夜悲號不絕聲歸乃刻木爲二像謹事之時時上食有他出則告而行有時物

必薦而後敢嘗遇忌辰素服哭泣兄死遺一女撫養之不啻如已子疏屬有貧而鬻男者取券代贖鄰有蔡四者被負而嫁其妻爲償其負而返之盜入其家祛篋竊貲旣獲諭之曰若亦逼於饑寒耳予忍被爾以盜名哉亟改行無罹於辜今子姓蕃昌科甲接武邑令書其堂曰熙德御史具奏豎坊旌表其門

彭僖

彭僖字樂善崇安人少負才氣由太學生授崇德縣丞縣當水陸之衝民繁事殷號稱難治僖代其長區畫事事有條復以慈祥愷悌行之民歌誦其德六載

上章懇乞致仕老稚留之不可得相與裹糧拏舟送至浙江泣別而還

滕 康

滕康字景晉建安人由鄉貢通判松江改惠州所至多善政藩臬交薦之陞知惠州府廉勤沉靜舉措不苟在任十餘年政蹟顯著

吳 義

吳義字用宜政和人景泰間知零陵縣恒以清正自持吏畏民懷幾三載丁內艱歸行篋蕭然民爭致贈贐郡守亦憐其貧以帑藏餘財資之俱不受比服闋

詣部以疾致仕

趙熙

趙熙字文輝浦城人正統間由太學生授濱州判官爲人淳謹愿慤勤於問學素履尤持重篤實與物無忤自筮仕初以致歸老冠服不改其舊人稱其有儒素之風

魏祖忠

魏祖忠字邦直建安人自幼讀書恒以古人自期父康以丁產應廣實倉斗級虧糧法當論死祖忠毅然別妻子詣官請代父罪繫獄歲餘典刑官至將論決

忽遇恩宥得原免人以爲孝感所致

黃賓

黃賓字朝用崇安人性孝友溫和開學有源委由邑庠生入南雍文行爲六館最拔萃歸省中途聞父喪徒跣匍匐至家葬父于白花巖下蔬食水飲廬于墓側終其喪親族有不克養者椎地以與之卒之日邑人咸掉涕奔走哭吊者踵相屬于道

蘇鉉

蘇鉉字良鑑別號竹坡建安人性孝友尤穎敏淳篤喜讀書好吟咏善書翰及寫竹石花木山水爲人所

珍雖居城市自閉門不干世事一時大夫士咸禮敬之所著有竹坡吟稿二十卷藏於家

徐驥

徐驥字尚德浦城人性恬靜常爲詩文不以榮進介意由邑學弟子員陞太學偶得例授府知事之職以歸題其遊息之所曰安靜日以經史自娛家雖貧處之裕如也邑士夫高其學行皆遣子弟從之遊邑之登賢科者多其所造就也所著有洪範解訂正皇華詩及文

楊旦

楊旦字晉叔號偲菴建寧府建安縣人太師文敏公  
曾孫髫齡穎異絕倫領成化癸卯鄉薦庚戌登進士  
二甲第一名授吏部歷驗封考功時太宰青谿倪公  
岳性嚴毅慎許可顧獨器重之繼青谿者鈞陽馬公  
文升尤峻急難近每持正議初若相迕卒乃贊其言  
嘗考察京職有僕夫被黜黃綠奏辯者有旨再覈實  
馬倉卒拜 命欲改擬以從旦毅然持不可曰 祖  
宗來未有此例且倅門一開後將謂何都御史浮梁  
戴公珊亟是之而馬亦悟竟覆罷甲子陞太僕少卿  
乙丑改太常正德丙寅乞 命歸省蒙路費寶鑑之

賜丁卯起復逆瑾欲一要見卒不見遂以違限例出  
知于溫溫海邦也地大物衆務剷奸繢治之不遺力  
郡以大治自謫宦以來大書上帝臨汝母二爾心于  
座右僚吏遵度不敢縱居溫二年庚午遷爲浙江副  
使督學政會當鄉試以五閱月週廻數千里所校士  
允愜公議辛未逆瑾誅起爲應天府丞尋進尹順天  
順天素號煩劇難治竟就緒貧民有負內供不能償  
者請以班罰并帑藏之羨者以代仍禁縣吏無重科  
巨冠劉六等流刦近畿又四方流民薦食京師道殣  
相望因募人爲叢塚收葬之人多感泣壬申陞南禮

右侍嘗攝國子監事士心歸之尋轉禮右侍掌太常寺事歲抑浮費民力賴以少紓丙子改戶侍奉勅總督京通等倉時總督監督中貴人多日刻剔奸蠹持正不回屬官倚以爲重而中貴人久亦自服尋陞都察院右都御史總督兩廣軍務兼理巡撫時嚴枉道之禁念母老疏請便道展省允之抵家侍彌月亟戒行以夏六月抵任乃肅紀綱飭武備省刑獄汰苛濫百度燦然一新會番禺清遠河源等縣蘇嶠十八山滴水巖青龍崗帽子峰等寨猺獞負固稔惡所過大肆焚掠民甚苦之乃調集官軍土兵命僉事王宗

源都指揮董禎等分道並擊斬級俘獲不可勝紀捷聞聖書褒獎已卯秋宸濠之變南贛撫治都御史

陽明王公咨援兵旦卽委兵備僉事王大用朱昂都

指揮歐儒于大經整兵以行尋得報元惡已就擒地

方底定遂罷行田州府土官岑猛知府岑灤族黨也

弘治間灤亂猛降級指揮僉事因功陞指揮同知夤

緣奏辯覬復其官會龍州知府趙源亡嗣襲以姪

相猛因黨其妹所立假子韋璋者賂京還驛使詐傳

詔旨起兵遂與璋襲破龍州逐知州趙相乃賂遺

本兵及當國者猛圖以功贖罪復原職璋圖冒趙宗

奪龍州請託於旦執不可當國者廣人也子弟素與  
叛人通而本兵司馬擅作威福巡撫者歲有厚餽旦  
獨無三人交怒乃嗾巡按廣西御史曹珪誣劾之吏  
部爲之駁白誣竟不行未幾聞母周夫人計奔喪歸  
家哀毀踰禮嘉靖壬午服闋遂起掌南京院尋陞南戶  
書甫蒞任又改南吏書甲申秋吏部白巖喬公宇致  
仕廷議會推旨又改旦以比具疏力辭不允會  
見山桂公羅峯張公以傳奉陞學士旦率部院諸老  
上疏論列語極激切用是忤旨遂爲給事中陳洸  
所誣劾疏下吏部議時左侍郎孟公春覆題亟辯其

誣竟有旨令旦致仕公論大譁旦抵家坦然自適  
放情於溪雲山月間以詩酒自娛旦祔事三朝歟  
歷中外幾四十年所蒞若銓衡學校甲兵錢穀禮樂  
及刑獄馬政邊防皆諳極要領且清介絕俗奉身甚  
約至於軫窮恤族諸惠利事則爲之又甚力性至孝  
奉母周夫人雖顯貴侍養不少衰初成化間宗黨構  
難業已籍沒比貴乃力贊其兄昺雪辯竟蒙恩復  
如初文敏公祠雖立而祀未虔乃疏以請卒如南陽  
李文達公例春秋祀焉月朔必薦新旦必具衣冠率  
諸子姓謁祠退而立諸堂下必訓以忠孝大節庚寅

秋七月危坐而逝